

摛藻堂四庫全書薈要

集部

欽定四庫全書叢書要

集部

宋詩鈔卷四十五



詳校官候選知縣臣吳向華

欽定四庫全書叢要卷二萬二百九十七集部

宋詩鈔卷四十四

內閣中書舍人吳之振編

李覲

江集鈔

覲字泰伯南城人舉茂才異等不中以教授養親從學日衆范仲淹薦試太學助教嘉祐中召為海門主簿太學說書卒門人鄧潤甫上其所著書尤長于經制朱子謂李泰伯文字不軟帖氣象大段好實得之

經中雖淺然皆自大處起議論若老蘇父子得之史
中戰國策故皆自小處起議論真知言也詩雄勁有
氣鍊用意出人有云格如平易人多愛意到幽深鬼
未知見其得處矣

魯公碑

他人工字書美好若婦女猗嗟顏太師赳赳丈夫武麻
姑有遺碑歲月亦已古硬筆可破石鐫者疑虛語驚龍
索雷關口唾天下雨怒虎突圍出不畏千強弩有海珠

易求有山玉易取唯恐此碑壞此書難再覩安得同寶
鎮收藏在天府自非大祭時莫教凡眼覩

玳瑁石

前有縣大夫取此石為器囂然夸謂予材與工俱美如
何爾鄉人器用曾莫備無乃居荒陬俗鄙不喜事答云
此石堅攻磨動時歲官用錢出民民用錢出已出民官
不知喜一作惠事誠可貴出已乃傷財誰能一作其不惜費
大夫聞此言如有所忿戾今君倡是詩敢以報嘉惠

秦人峰

秦法雖甚苛秦吏若猶拙山林不數里俾爾逃得脫予觀後世事政役火烈烈苟非為鬼神何計避羈繩聖皇今在御百事咸均節常披詔書意苦念生財竭誰能將順者所望在賢哲無使峰中人笑我民屠裂

虎跑泉

虎跑本何為彼將對以臆有如大丈夫卓爾抱剛直盜泉既不飲譖人亦不食山中小禽獸何足勞捉搦勇氣

無所泄爪地成遺跡地神嘉乃誠水源如開闢尋常竊六畜夜傍入牆壁是與豺狼同聞此宜慙色

哀老婦

里中一老婦行行啼路隅自悼未亡人暮年從二夫寡時十八九嫁時六十餘昔日遺腹兒今茲垂白鬚子宣不欲養母豈不懷居繇後及下戶財盡無所輸異籍幸可免嫁母乃良圖牽車送出門急若盜賊驅兒孫孫有婦小大攀且呼回頭與永訣欲死無刑誅我時聞此言

為之長歎吁天民固有窮鰥寡實其徒仁政先四者著
在孟軻書吾君務復古旦旦師黃虞勅書求節婦許與
旌門間繫爾愚婦愚豈曰禮所拘蓬萊四十年不知形
影孤州縣莫能察詔旨成徒虛而况賦役間羣小所同
趨姦欺至骨髓公利未錙銖良田歲歲賣存者唯菜汙
兄弟欲離散母子因變渝天地豈非大曾不容爾軀嗟
嗟孝治王早晚能聞諸吾言又無位反袂空漣如

寄懷三首

鳥獸死有用羽角筋革齒輦輓人工師飾作軍國器玉
食白如瓠瞑目已腐穢生者不敢畱埋藏與蝼蟻百年
富貴身孰若禽獸類唯有令名人終古如不死

根生但為松翼飛但為鳳王侯尚可輕道義本來重癡
兒似婢妾寸步矜恩寵傍人忍笑時佯把衣袂羨

齷齪復齷齪淺謀同燕雀不思明日憂但取今日樂俗
儒抱書卷未去眼中膜誰將古人淚更為今人落

喜雨

人皆喜膏澤我獨憂豐年歲凶已賤耀年豐安得錢賦
役忽驚駭倉廩甘棄捐銖銅苟可換富貴寧我憐歸來
官事了相弔柴門邊農夫未盡死穀價應常然王心幸
仁聖分職當忠賢謂穀賤為美咄咄無欺天

寄祖祕丞

我本山田人好尚與衆異平生重交遊所得固無幾昨
者應茂才西行覲朝美時當慶厯初選舉實多士茫茫
帝王州栖栖遠行子携錢貨破屋乞火蒸陳米鞍馬到

即賣僮僕寢難使有時造公卿努力向塵市數步則一
歇長吁乃能起衣冠信質野言語欠婉媚聞人顧之笑
將命見而避往往得所請蹠蹠向前跪何能剖懷抱浪
自慕尊貴貴人如天神喘息生雲氣野夫等麋鹿芻泰
非所冀歸來坐空窓惆悵夕不睡塵埃滿鬚髮臭惡入
口臭業已辭吾親中道豈可廢僵俛待報聞愁憂遂經
歲二年正月晦間房適假寐有奴來啄門手披擇之刺
承命驚下床赤脚誤穿履從來未識面只是聞高第名

顯宦且達見我當何為再拜請就席熟視知可畏昂昂
貌甚古崖石掀氣翳渾渾氣甚和璞玉無芒鋒高談貴
先哲雅意在茲世昔人相遇間一言猶合契今吾於擇
之寧假再三計自此習往還中心蔑疑貳如熟息廣廈
如飢享盛饋君授南康守舟維蔡河涘我館汴之陰前
去路則邇時時結帽帶踽踽尋英軌衆人矯綺羅相對
紉蘭芷朱絃自三歎笑殺彼鄭衛王命有期日都門一
反袂君行劇鴻軒我處近匏繫曠日及孟秋皇慈始收

試崇崇九門開窈窕三館祕主司隔簾帷欲望不可跂
中貴當棖闇蒐索徧靴底呼名授之坐敗席鋪冷地健
兒直我前武怒足防備少小學賢能謂可當賓禮一朝
在檻寢兩目但睭眴捉筆析所問移時數千字讀書取
大者纖悉或靡記爻背雖自奇寧當至尊意龍馬騰天
衢駕駘合羞死量才與揣命坦蕩更何事振衣託歸舟
河流迅弧矢淮清江且平踰月在枕几及過廬山南聞
君初布治船檣既入岸馬首已來暨迎我到府署相見

共欣喜嫩橘摘干苞肥魚斫千尾蕭晨徹骨清佳境邀
人醉高會雖暫歡故園當速至草草成別愁悠悠渡湖
水是時東方曙俄然北風厲陽烏畏威逃江神以儒戲
氣象斗不同波濤大可憐長帆張欲裂孤舟蕩無倚或
從玉井出或自銀山墜篙工歛手立脉脉無窮淚從者
閉目坐嗟嗟不敢視我時撫床歌分作長江鬼所恨生
劬勞不孝而已矣禍福果無妄險難行可弭脫身得平
康引領望鄉里厥後過挾日幸得見維梓入門何怡怡

饌具有甘旨稚女能紡針驕兒徧生齒芟除閒草萊疏
通舊沼沚君廬可終焉生計由此始郡守方仁賢學宮
盛修理踵門致勤恪命我論經藝麻衣何紛紛鄉人子
若弟不唯務章句所欲興禮義施為有本末動靜有綱
紀蚤與雞同覺夜與月相值孳孳忘飲食斷斷在文史
時附南康書或逢北來使尺素雖滿前語言難到耳殆
及三年冬聞君受朝寄名稱按刑獄勢可平冤滯故人
漸大任賤子差自慰軒車日已遠翰墨益難致薄命良

可傷降災渾未已是年之季冬舉家纏疫癘老母尚委
頓微軀蓋蟠蛇形骸非我有魂魄與心離權柄在鬼物
功力非服餌曉突誰能炊午闕猶未啓荏苒再週月幸
會天不棄春風動枯槁甘雨澆根柢行行夏交秋吉微
凶不替高堂何戚戚疾病日攢萃一夕脾臟間發泄不
復止詰朝問無言目瞑口齒閉號呶諸兒孫雜沓大鼎
沸嗟哉當彼時誠恐弗可諱醫師相急熱巫覡兩經緯
藥草極酸辛法術殫怪詭薄暮乃復蘇踰旬僅知味方

茲戀庭闈旋已對獄吏試言其所由內省亦無媿有人
同州間發迹自徒隸竊被儒衣裳曾亡小材技突如游
京邑欲以干明獻朝家焉可欺羈旅謀自濟乃造黃紙
書便取青袍衣乘船歸南方歛板謁當位自言章奏竒
因籍宦官勢詔文降自中宰府不預議既云能占天且
曰善興利江淮一經過郡府十不啻到處爭逢迎莫能
思處置轉運苦愛竒得之如國器故使按坑冶庶可展
才智小人靡忖度假罷愈放肆行符索吏卒圈印發傳

遞聞問望塵拜州縣從風靡遮道結繒綵鋪筵塞珠翠
車騎前後呵給使數百指何者為典型獨自誇仄嘴在
昔秦無人繞朝贈之筆歸我非聲瞽碌碌寧不恥作書
貽諫官姦詐患不細有詔令逮捕按驗取真偽是夫知
計窮誣我以罪戾上官猶眩惑準例皆拘繫幽幽固犴
中憤憤爭競裏周旋二十日乃克見巧敝畫地尚不入
叢棘曷可宾惟茲謝吾母幾不全髮體教道亦難行凡
庸豈同志吁哉養英才徒以釣積毀箇書歸敝廬庠門

任無穢去年仲夏後盛暑若火熾郊原有餘爽蔬果聊
可嗜時復觀田疇畢力奉耘耔人生但飽煖此外皆淫
侈思君非一日欲去無雙翅俄聞遷黃州又說丁喪制
古來聖與賢誰不遭醜詆蜀日駭狗犬夏鼎愁魑魅人
壽有短長孝子謾憂思滅性經所貶節哀禮為是矧夫
王佐才簡在唐虞際揚名以顯親報德豈不贊加飯苟
如願蒼生猶有恃適時匪我長不朽乃所擬道義果弗
充富貴反為累回憲本無官桀紂焉得此俗子但相非

吾心已居易近者遊葛陂念君在袁泉作詩布憂懷讀之勿嗤鄙

女色無定美贈卿材

女色無定美寵至美則多士才無定稱用顯稱已過長
安小家子粲粲秋池荷性慧不覺恥母憐不加訶出戶
一囊廩見人雙眼波情動笑難止語嬌音屢訛都人口
如沸觀者踵相摩因緣幸充選恩澤成偏頗少費萬金
珠一呼千綺羅佯愁惄白日猛唾傾天河東鄰有賢女

春綠涵修蛾花艷不裁剪玉光無切磋自小固聞禮藏
頭豈知他親戚尚未見媒官當奈何過時誰訪問生世
就蹉跎豈不有配偶市里或山阿豈不有奉養春餧與
機梭列女不得傳樂府無人歌容華日衰落涕泣坐滂
沱富貴易修飾貧賤多笑呵柳下無仲尼小官終滅磨
進退在勇決遲疑兩皆蹉退當事竒偉夙駕追雄軒進
當取勢位健筆為干戈胡然守一節獨自埋隨和

江亭醉後

平生尚倜儻壯大苦摧折主人能結納佳境為鋪設渺
瀛東江來詒衍暮雲裂倡女稍多藝市酒且供啜俠氣
復何聊心朋幸相悅解冠從放蕩大呼誰輓掣咄哉千
里足嗟呼三寸舌海物喚龍取天葩令鬼折豔唱聲非
雅戯談理當謫帷房笑私昵閭巷嘲瑣屑更鼓莫催睡
夜風纔去熱俗士鮮大志于今重小節內行豕在泥外
貌犬伏紲吾儕古豪傑方寸浴日月被謗肯自疑為歡
顧猶拙放飯彼不慚使我無齒決

弋陽縣學北堂見夾竹桃花有感而書

暖碧覆晴殷依依近朱欄異類偶相合勁節何能安
時盡妖豔無地容檀樂移根既不可潔心誠為難外貌
任春色中心期歲寒正聲尚可聽誰是伶倫官

讀韓文公駕驥篇因廣其說

主人渴良馬僕夫念駕駘行遲追易及力少牽易來時
聞千里足百箭攢其懷主人雖欲買衆口大悠哉

蝦墓

蝦蟆爾奚為閣閣攬人耳在官不為官在私無私事徒
將一寸口日夜相鳴吠豈能儳語言且欲噪夢寐何者
孔稚珪愛之如鼓吹誰論正與淫各自有知已

惜雞詩

并序

曩予家居見雞有異者為之動心嘗欲作而不果戊
寅夏五月學於山中乃追賦之曰

吾家有雞母乘春數子生生來踰六旬互覺羽翼成其
母且再卵逐之使離散衆雛既不來一子獨戀戀戀戀

不肯離逐之終不移母行無險易唧唧相追隨卵生亦
云足母伏窠中宿厥子苦無依攀背如悲哭窠中母所
安忍渴復忘餐子於背上卧不舍須臾間我時見之喜
異類能如此因欲觀其終其終諒何似一朝大長成乃
知牝牡情膨脹娠在腹漸見東西行行求飲食欲以
助生息卵出子還多養子何勞役朝啄荆草林暮爪汙
泥深昔時隨母意今作愛雛心雛生誠可愛母老寧忍
背物性乃不常使人心歎慨物類本無知無知孰責之

斯雞與衆異酷似有天資天資以仁孝變更何太早況
彼本無知血毛安足道萬物靈者人孰不念其親少艾
與妻子所以奪吾真五十慕父母虞舜稱稽古埋子得
黃金邇來唯郭巨古人往莫追言之淚沾衣斯言足自
警題作惜雞詩

聞女子瘧疾偶書二十四韻寄示

昨日家人來言汝苦寒熱想由卑濕地頗失飲食節脾
官驕不治氣馬癥如絀乃致四體煩故當雙日發江南

此疾多理不憂顛越顧汝僅毀齒何力禁喘噎寄書詰
醫師有藥且嚼啜方經固靈應病根終翦滅但恐祟所
為嘗聞里中說茲地有罔兩乘時相胥結嗟哉鬼無知
何於我為孽我本重修飾胷中掬冰雪禍淫雖甚苛無
所可挑抉疑是饕餮魂私求盤碗設盡室唯琴書何路
致革血無錢顧越巫刀劍百斬決徒恣彼昏邪公然敢
抄撮吾聞上帝靈網目匪疎缺行當悉追捕汝苦旦夕
歇慈愛早有加憶念今迫切塵勞差可畏歸計又云輒

所生能劬勞祖母矧聰哲羸卧縱未蘇撫視諒非拙勉
多自安風來信勿絕

讀史

子長漢良史筆鋒頗雄剛惜哉聞道寡氣志苦不常心
如蟲絲輕隨風東西揚一事若可喜不顧道所長公言
紕原憲俠賊乃為良仁義謂足羞貨殖比君王黃老先
六經斯言固猖狂吁嗟夫子沒兩觀無刑章予懷班孟
堅駁議何洋洋傳與後世人慎思其否臧

竹齋題事

低齋結空野小竹移孤林齋閒竹淨好日媚幽人心南方夏厭暑獨此留殘陰憂雨挫促夢穿風搜涼襟長茵展麗鮮亂歌奏歡禽待奴裏村服語客拋塵簪志高成利儻思爽生詩淫值聖喜盈卷感古悲入琴山迎穩履遠月勸澄杯深榮名雖未染幸亦非堙沈

雨中作

羣陰侮陽德雨陣春嘈嘈白曉慘成夜瓦口生飛濤凝

雲列山。鞘冷氣攢衣。刀徑闊。有松竹庭卧。唯蓬蒿花淫。
得罪隕鶩。辯知時。逃隰苗。出水短木茵。隨日高微吟。雅
於樂快飲甘如膏。朱曉待未見。天蓋空牢牢。

閔雨詩

吳江之南是曰豐國五種之生天下食一歲不登吾民
菜色如何天不仁縱彼旱孽稱其神矯矯赤龍推火軒
來自東南山咸池悞水不敢沃陽侯失色愁烹煎况茲
畎畝流涓涓何足吸之脣齒間但見禾與黍蓬勃紅塵

起土伯勅其屬埽路迎飢鬼哀哉氓蚩蚩託身金鬲惟
蒸炊小人怨咨君子知天生天殺今其時我聞皇穹大
德在生育愛養萬物同嬰兒產民之身賦民食中道絕
之何所為當時冥冥間委任非其宜山川之神各守土
羣龍受位司天池上帝臨軒親戒勅十日一雨無愆期
帝心仁且信臨下固不疑謂言庶事有分職屏去視聽
忠無為安知愚下鬼負德孤恩難制指弄天之權侮人
命貪嗜牛羊邀祭祀忽焉一物不稱情因教此旱災生

靈雷霆之官畏罪莫敢諫頭枕天鼓眠不醒帝在紫微
垣下隔千里雲徒勞衝血向空哭帝心雖聖安得閑北
斗侍帝側幹運氣母均四時五星暨衆宿照曜亡偏私
夫何容此鬼恣行曾臆輕天威定是機務繁耳目有所
遺小臣亦何者草莽負竒節欲係神頸無長繩欲斬龍
頭劍鋒缺皇穹如未察凶邪空使小臣心鬱結

甘露亭詩

乾坤父母莫匪慈胚胎億兆成角羈其間哺乳不及處

有時泣殺呱呱兒南川上游號沃野景祐丙子嘗凶飢
新田始苗舊穀罄十室八九無晨炊伏陰何者不仁甚
釀作水災來助之煙煤刷天雨汗黑嘔山泄谷爭奔馳
橫流一夜打城邪萬弩竊發穿毛皮東隅有洲戶揖揖
如蟻欲走遭水圍屋根無力樹腰折蛟蜃食人猶擇肥
濤波一望萬山阻六親不得相扶持國子劉公好仁者
惟時假守茲軍麾民生在我不在命告舟往救無敢違
童兒赤立婦女困載之剗木何纍纍泥沙外冷內飢渴

口噤不語如狂癡牽攀坐卧滿府舍賦以酒飲加餧糜隨流往往亦不死遠在百里無人知捐金購得問氏姓名使親族携之歸司農倉廩盡發出不待奏報先施為有餘況可補不足大賈蓄家如響隨來瞻去察夜繼晝亦熱不忍蔭華棟由斯一郡十萬戶餓膚日月生膏脂存者相保沒者葬唐虞仁壽重歐躋聖主養賢賢養物氣和郁郁通高卑城西老宮古松徑一朝墜露甘如飴千柯萬葉結不解玉階瓊樹光離離耽俗奔走競觀覩

手攀口吮同齋學老之人周氏子好善不類黃冠師
欲令事迹絢久遠築亭其地高巍魏公之歸朝不可借
松樹至今猶未衰我作此詩揭亭上他年墮淚如羊碑
答緣槩師見示草書千字文并名公所贈詩序
佛繇西域漸中土欲使羣心皆鼓舞若顥梵語及胡書
昧者雖存明孰與其徒往往多材能暗結時緊為外助
遠公自昔來廬山誇逞蓮花邀社侶吁嗟君子遭亂邦
舍此未知何處去邇來一行善記覽舊破乾坤尋厯數

或攻文苑掠芬香辭則貫休筆懷素其餘曲藝與小詩
布在人間難悉數賢豪大抵多憐才引致門牆無齟齬
其人既重法亦尊羽翼大成根本固我緣山谷見不遠
緇褐憧憧盡愚魯坐量此去朋黨衰纖縞焉能拒強弩
去年有使自番陽手藉一函來我所發函乃是緣緊書
千字滿前雲縷縷衆人飽食已用心欲噍伯英肥美處
當時名士嘉其能長序短篇聯繡組因思幅員千萬里
如師之能更幾許以儒輔釋日益多何惜區區一韓愈

春社詞 并序

寶元二年嘗夢大雨震所居室驚而仆地既已有一題曰春社詞詞或作篇字不能審覩懼栗栗援筆得八句與之

及覺尚記其首三句頗怪麗今七年矣值暇日以五句足之

吳臺覩春鎖春色雨刷花光入龍國田邊大樹啼老鴉
野雲癡醉寒查牙年華欲住風雷惡蘭臉知秋淚先落

時榮時謝無了時扶起混沌湏神醫

聞喜鵲

翩翩者鵲何品流羽毛白黑林之幽生平智力可料度
有巢往往輸鳴鳩天然郤會報人喜愚兒幼婦惟爾求
萬聲千噪幾曾驗聞者終是軒眉頭從來烏鳥愛反哺
孝慈情性誰可儔其間於事最先見告人凶禍令人憂
憂時不肯自修飾禱請神鬼爭啾啾告之愈驗愈見惡
共云災患鴟之由彈丸瓦石相驅逐名園佳樹難依投

忠言逆耳世罕用屬鏤曾剖伍員喉莫笑後來司馬公
事事稱好真良謀

秋夜

披衣坐小亭夜氣拂人清月暗先成暈蟲吟不識名舉
杯期混沌開卷賞蘊英此興知誰會松風鶴睡驚

睡思

俗語不入耳旅愁還對心坐多渾易厭夢好欲重尋是
雨撩蓬響殘陽過嶺陰廻看奔競苦此興貴南金

鑑湖夜泛

以明月到樽前為發句

明月到樽前
擧舟古岸邊
亂山斜入霧
遠水倒垂天
酒氣薰龍戲
歌聲美鶴眠
迴頭嗤李郭
此外更無仙

池亭小酌

得和字

客思都無著
臨池一醉歌
喚春回物象
移性入天和
月影碎荆玉
波紋緯蜀羅
相看盡仙骨
俗態已無多

感事

太平無武備
一動未能安
廟筭何時勝
人生到處難

頻農力耗賦重女工寒祇有吁江守憐民不愛官

閒居

無物可勞情空郊日閉局雨吟春破碎貧飲客凋零世事重江險才名一夢醒同心祇松柏見我尚青青

萍

盡日看流萍誰原造化情可憐無用物偏解及時生泥滓根萌淺風波性質輕晚來堆岸曲猶得護蛙鳴

送張礪

人意皆懷土嗟君無故園欲行須盡室此去又他門
靜裡文章好貪來節行存振淹知有日倚伏豈虛言

寄題廖說蒙亭

聖人雖在上君子有窮時自得山居樂何湏世俗知夜
多松月分涼與水風期只恐亨通去清閒却付誰

養疾

小小唯貪酒病來纔信醫問方逋客許尋藥野人疑夜
擣全聽憒寒煎覺沸遲古賢曾愛死此意亦誰知

遠山

最能牽病眼天際一山橫盡日是秋色無人知地名暗
時雲自合缺處路應平才子零衣淚千秋共此情

早歸

病馬不妨騎出門常便歸見人無事說是物與心違通
塞元關命驅馳轉覺非莫教塵裏汗壞却篋中衣

晚聞角

傾耳斜陽裏無聊拭淚頻平生慣聞處今日自愁人夜

近歇不久風來聽得真胡笳更何物只此已傷神

哭女二首

妻死女已病踰年成二喪此生誰骨肉未識好衣裳看
面雖猶小聞言盡可傷最知憐祖母句句刮人腸

老樹枝葉薄先秋風雨過人間不善事身外想無多理
遺誠如幻悲來豈奈何從前短鬚髮為爾漸雙皤

小女

恃汝今何恃言來淚滿襟死生雖分定襁褓累人心飢

買鄰家乳寒勞祖母針豈知泉路隔時撥蕙帷尋

龜峰精舍

去縣二十里路平時正春四山唯有石一寺更無塵融
結疑天意經營憶古人但知安樂處何必是金身

鳴蜩

雨餘雲漏日蟲思已喧喧時節變初夏聲音似故園為
誰吟綠野相共送黃昏便是秋來信霜鬢更幾根

送春

送爾歸天去天應解禍淫物生誰得所我見獨傷心

楚

有目極千里傷春心之句好景吟來徧芳樽醉不禁東風別無用百

草已成林

次韻閻判官除夜

密雪穿窓入孤燈向壁光老來人不覺夢斷酒猶香世事休思慮年華任短長朽株難長育空此見春陽

寄黃晞

長憶黃夫子才高行亦淳世情輕近事見慣即常人何

力康時務將身後路塵七閩山水國是處好安貧

廻明上人詩卷

學佛有餘力吟詩過一生情閒氣皎少句好琢磨成柏
竹門庭古永霜筆硯清輸他飽食者終日自無營

送任大中

真偽少分別吁嗟此世情西施作老婢南郭逞新聲命
合生來困詩應沒後名旅游何所得赤日又徒行

送何祕丞

吳人作蜀官萬里泝驚湍地俗雖云異民情想一般智
明終戒察政惠不須寬前史多循吏乘閒更熟看

鄉思

人言落日是天涯望極天涯不見家已恨碧山相阻隔
碧山還被暮雲遮

少年

新翻曲調恐人傳不許高聲唱玳筵金獸也嫌春態淺

向風噴作綠楊煙

自勉

月出東生日又西莫隨兒女醉明時黃泉一向埋愚鬼
不與人間史筆知

戲題王臺集

江右君臣筆力雄一言宮體便移風始知姬旦無才思
祇把幽詩詠女功

雪中贈柳枝

暖氣來時柳眼新一場冰雪更愁人要知真宰無誠信

取次東風未是春

柳枝答

春早寒餘豈足哀
平生多難媿非材
去年二月都城裏
曾共花房帶雪來

慶歷二年二月
五日京師大雪

讀長恨辭二首

玉輦迢迢別紫臺
繫環衣畔忽興哀
臨邛謾道蓬山好
爭奈人間有馬嵬

蜀道如天夜雨淫
亂鈴聲裏倍霑襟
當時更有軍中死

自是君王不動心

戚夫人

百子池頭一曲春
君恩和淚落埃塵
當時應恨秦皇帝
不殺南山皓首人

有感

官家的的要寬征
古時什一今更輕
州縣酷嫌民漸富
幾多率斂是無名

白刃刦君君勿言
人生禍難具由天
君家歲計能多少

未了官軍一飯錢

庭下縲囚何忿爭刀筆少年初醉醒黃金滿把未廻眼
笑殺迂儒欲措刑

遊寺醉歸却寄同坐

江村古寺偶閒行一飲全疑酒有靈水底屈原應大笑
我今獨醉衆人醒

索酒

不醉多愁醉多病幾廻愛酒又停杯死生若是有天命

莫放愁來任病來

憶錢塘江

昔年乘醉舉歸帆隱隱前山半日銜好是滿江涵返照
水仙齊著淡紅衫

謝傅神平上人

最陋徒煩妙筆傳呼兒看了獨淒然丹青不解隨人老
相似都來得幾年

閏正月三日偶書二首

一步寒郊一慘眉望春春色苦來遲東君未必私桃李
只恐梅花謝有時

無賴年年逐酒徒今年不飲興何如醉鄉若有人名籍
但願春風點檢疏

論文二首

今人往往號能文意熟辭陳未足云若見江魚須慟哭
腹中曾有屈原墳

天寶年中事事新長安還有謫仙人騎鯨去後無尋處

輸與勾芒自管春

漢宮

哀平外立國權分只為當時乏嗣君試問奉新誰佐命
最應飛燕是元勲

燕雀二首

燕子從來巧語聲主人相愛是常情黃頭老雀何能解
飽食官倉過一生

繡戶朱簾見最頻暖來寒去但安身翟公門下時飛入

全勝交情斗頓人

送春

宜春臺上送春歸
淚滴金杯不自知
懊惱黃鸝解言語
飛來惟見落花枝

曉角

腸斷城頭畫角聲
燈青月黑酒微醒
濃香夢裏誰曾管
只在離人夜夜聽

登越山

臘後梅花破碎香
望中情地轉淒涼
遊山只道尋高處
高處何曾見故鄉

送古山人

喜聞吉事怕聞凶
天下人心處處同
乍出山來言語拙
莫將刺字謁王公

送毗師西遊

望望王城十二門
青山行盡入紅塵
近來富貴皆天與
到處應多問命人

送春寄呈祖袁州

去年春盡在宜春醉送東風淚滿巾
今日春歸倍惆悵相逢不是去年人

酬陳屯田途中所寄

封豕長蛇戰嶺南何人肉食不懷慚
只今惟有高眠好風弄松聲水濺菴

正月二十日俗號天穿日以前餅置屋上謂之補

天感而為詩

媯皇沒後幾多年夏伏冬愆任自然只有人間閒婦女一枚煎餅補天穿

苦雨初霽

積陰為患恐沈綿革去方驚造化權天放舊光還日月
地將濃秀與山川泥途漸少車聲活林薄初乾果味全
寄語殘雲好知足莫依河漢更油然

野人

村落蒼茫半草茅路無車轍水無橋婚姻取足惟春蘭

鹽酪歸來待晚樵一樣寬衣綰效古幾人華髮未經搖
相逢不會寒溫語借問官家合是堯

書麻姑廟

流俗好仙方學道至人樂道自成仙飛昇若也由貪欲
紫府還應用詐權塵裏笙歌千古夢洞中星斗幾家天
無心便是歸真日姹女河車總謾傳

客中話丁祕監京師舊宅因而傷之

等閒榮謝已愁聞況話三公極罷身青史尚為今世事

朱門不是舊時人文章散入諸蕃口花藥留添上國春
生死交情渾易見有誰過此為雲巾

五龍塘

世傳鱗物有蟠時分得寒泉住翠微天命雖教為潤澤
神心終是索虔祈一圍石岸利無迹幾族陰雲禁不飛
風脚斗回波面黑向人渾似逞嚴威

寄小兒

兩世茫茫各一人予無兄弟才生此兒三歲矣生來且喜富精神欲

教齡艱從師學祇恐文章誤爾身但有犁鋤終得飽莫
看紈綺便嫌貧不知別後啼多少苦問家僮說未真

秋懷

褚冠斜頂對清秋病骨支撑懶上樓輔世功夫何日是
少年滋味此生休山含紅樹隨時老天帶黃昏一例愁
自笑酒腸空半在前村無處典鷄裘

書松陵唱和

天命相逢陸與皮當年才調兩權奇朝端未有輸忠處

詩外應無用力時意古直摩軒昊頂言微都洩鬼神私
近來此道中興也泉下英魂知不知

早起有懷

草草西風動葛衣呼僮前啓竹間扉山僧好睡鐘聲晏
社戶多貧酒氣微豈是客愁渾較可抵因書卷解忘歸
盱江百里清無滓枉屬閒人坐釣磯

清明日作

遲遲日景坐成曛聞說清明在此晨花卉不宜愁眼看

勾芒能為幾人春銷磨志氣多因老點檢交遊半作塵
欲向醉鄉聊自適病來還厭舉杯頻

晚思

一檻東風小笛開亂山明暗水萦迴流年漸共春華去
暑熱還隨霧色來天氣濁多人欲睡地形卑甚物先梅
因知楚客迷魂處不是江東不足哀

暮春始遊城西

病多無力逐紛華三月衡門未見花長恐後期成索寞

果逢殘景獨咨嗟
欄干倚望山空在
杯酒遲留日易斜
謾說明年更春色
不知園圃屬誰家

寄傅代言

交遊散盡客來稀
門掩城隅晝漏遲
春地更無嫌草處
雨天還有詐晴時
輕量世事世不罪
冷笑人言人豈知
猶喜道途收拾早
將閒對病最相宜

丙子冬至夜酒醒

盡道一陽初復時
不期風雨更淒淒
凌晨出去逢人飲

沉醉歸來滿馬泥多恨恐成干斗氣欲言那得上天梯

韓文公月蝕詩有無梯可上天之句

燈青火冷睡半醒殘葉打窓烏夜啼

南齋詠風

懊惱南窓一道風只應天配與貧窮不歸羅綺飄颻處
故入松篁冷淡中久坐披襟塵榻穩半醒吹面月帷空
城邊蘿苔知多少偷得清香是爾功

小雨

已是蛟龍未肯忙誰教蠛蠓更相妨來時槁葉疎疎響

過後浮雲片片光
徑草微滋垂粉汗
砌沙圓滴簇蜂房
嗟予不及高飛鳥
先得天邊幾點涼

題淨居院

寺門幽獨傍江城
江水清含地氣清
隔岸樓臺人醉死
遶堦松竹夏寒生
路經橋遠塵難過
僧占閒多俗不爭
唯有行吟憔悴客
這廻須去濯長纓

往山舍道中作

截竹成輿不用輪
東行盡日穩宜身
前看疊嶂如無路

每到平田始見人下戶半曾差作役朽株多已祀為神
生涯一撮誠何有且免庸兒共拜塵

秋晚悲懷

漸老多憂百事忙天寒日短更心傷數分紅色上黃葉
一瞬曙光成夕陽春水別來應到海小松生命合禁霜
壺中若逐仙翁去待看年華幾許長

殘葉

一樹摧殘幾片存欄邊為汝最傷神休翻雨滴寒鳴夜

曾抱花枝暖過春與影有情唯日月遇紅無禮是泥塵
上陽宮女多詩思莫寄人間取次人

哭十姪

到官六月一作日 寄書廻未病封題死後開一命至卑人

盡得九泉何事獨相催唯憂旅艤還鄉遠况是親喪繼
踵來數世學文終若此可憐門戶轉墮頽

秋陰

一夜風聲曉更狂起來庭戶頓淒涼不知紅日在何處

時見黑雲微有光天落水中兼雁影露垂林罅帶楓香
愁人莫苦登高閣說著江山已斷腸

寄介夫

天恨吾儕各一方夕陽千度到西窓因循流俗今皆是
磊落如君信少雙書未闊年難得到心從薄宦始應降
可憐漢水無拘係長與時江會九江

書懷寄介夫

棄材幸免雜興薪收拾繙衣出洛塵漸老得閒纔是性

謾言成謔且隨人能傳身後湏文字要識胸中只鬼神
俗子不勞輕毀譽問天長乞醉鄉春

俞秀才山風亭小飲

炎炎千室熱如烘亭壓山頭獨有風雨意生薄雲彩黑
秋容細碎樹枝紅半天斜日歸心動一函平川醉眼空
却是夢魂無所得人間豈少翠微宮

閩中歲暮

休道南人暖過冬苦寒今與北方同霜嚴欲裂地到底

日短不行天正中誰使智愚相伴老便將榮辱斷還空
鄉愁莫更欺閒客薄酒從來亦有功

白樂天有
酒功贊

偶題饒秀才谿光亭

北出城來駐馬蹄君家別館幸臨谿雄虹見雨還不斷
潦水到秋痕漸低萬事熱心成浩歎一樽擦眼怕長迷
俗人誰會偶生意是處醉吟還日西

早夏偶作

閒愁不覺過年光強半精神似醉鄉幾度雨來成惡熱

有時雲斷見斜陽古人事業塵空滿故國園林草自長
賴得南華憐我病一篇齊物勝醫方

自解

人生何苦要多才百慮攢心摘不開夜月幾曾無夢處
春風只管送愁來禿毫強會悠悠事浮世無過滿滿盃
看取秦坑烟焰裏是非同作一杯灰

不寐

四壁空空絕語聲困來終是睡難成孤燈要與人相背

寒漏苦教天不明累月故園無信息幾般閒事惱心情
別愁若解生華髮一夕應添一萬莖

韓偓集有自撫州往南城縣舟行見拂水薔薇之
詩南城吾鄉也因題八句

韓偓當年赴七閩舟行過此倍凝神江邊石上知誰處
綠戰紅酣別是春往事幾多書不記仙源依舊地無塵
花光柳色今何限更有才人勝古人

送王都曹

古木亭邊夜嚮晨錢壺重疊擁雙輪高文健筆科場手
白髮青衫宦路人十月霜風還傍面六街塵土曾欺貧
麻源碧澗神仙地早晚歸來伴隱淪

蓬屋

長簷數尺庇堂東疎漏從來只有蓬日影碎如秋樹下
雨聲初似夜船中竹經蠹了多垂地箬到乾時半捲空
此處想非人所競衆言千萬莫相攻

培基

堂前一級似階墀無石無甌只舊基泥飭頃因年節近
蹣跚唯是客行時誰曾羅襪雙來上多謝蒼苔久不離
從此便成貧景致竹簾垂處敢相宜

宜春臺

謫官誰住小蓬萊唯有宜春有古臺千里待看毫末去
萬家攢作畫圖來雲中羅綺香風落月底笙歌醉夢回
莫怪江山苦相助騷人沒後得真才

東湖

古郡城池已瞰江重湖更在郡東方水仙坐下魚鱗赤
龍女門前橘樹香路絕塵埃非灑埽地無風雨亦清涼
使君待客多娛樂只有醒時覺異鄉

野意亭

福唐城郭掌中窺旭日登臨到落暉誰在畫簾沽酒處
幾多鳴櫓趁潮歸晴來海色依稀辨醉後鄉愁積漸微
山鳥不知紅粉好纔聞歌板便驚飛

靈源洞

纔出塵來尚未知漸攀藤竹漸臨危伏流似是龍藏處
古樹應無春到時誰把石厓齊刻削直教雲氣當簾帷
良工畫得猶宜秘莫與凡夫肉眼窺

送黃承伯

君來別我向番陽時節初春曉尚霜茶褐園林新柳色
鹿胎天地落梅香此行硯席多知已是處樓臺可舉觴
只恐詔書非久下槐花又在眼前黃

清話堂詩

并序

至和元年秋九月與周伯達宿景德寺義明上人房
予憲誦李涉詩云無限心中不平事一宵清話又成
空其意與今夕相似因目其處為清話堂且題八句
釋子相延暫解冠一宵清話到更闌漆盤香燼死蚯蚓
紙瓦雨聲鳴彈丸往事莫將閒口笑勞生誰在定中看
明朝顙面還歸去依舊塗泥濺馬鞍

次韻酬屯田陳丈見寄

老年纔到病還催老病成叢撥不開腹冷有時如咽雪

耳虛終日獨聞雷半生辛苦歸三徑萬恨銷磨向一梧
賴得竹窓無事處清風頻共故人來

宋詩鈔卷四十四

欽定四庫全書

宋詩鈔卷四十五

集部

內閣中書舍人吳之振編

王炎雙溪集鈔

炎字晦叔新安婺源人所居武水之曲雙溪合流因以為號矣登乾道進士始令臨湘受學於南軒先生入中都官博士慶元四年為實錄簡討尋轉著作佐郎出守湖州年八十餘著有雙溪集炎詩頗為世俗

稱許然亦多庸調今擇其刊落者入鈔

遊硯山

壬辰

他山石徒多器寶匿幽僻產璞芙蓉坑金聲而玉德岡
巒外鉤連地勢中斷隔曲塢八九家路入羊豕迹澗水
抱石根石骨多紺碧北山上挽天南山勢蟠伏硯工二
百指日鑿崔嵬腹篝燈礪斧斤深入逾百尺我行冒風
雨周覽不知夕夜宿茅茨下青燈照岑寂酒闌呼匠氏
訪之語纖悉冰蠶吐銀絲蛟人織霧縠巧手琢磨之價

直黃金鑑斷嵒半傾欹舊穴久湮塞旁求得他材飲水
不受墨堅滑已支庶麤燥乃臧獲信知天壤間尤物神
所惜罕見固為貴有亦未易識瑕玉混一區語盡三歎
息摩挲蒼蘚崖此言可深刻

春日遣懷

感懷細數十年事養拙畧無終日閒景物自新春稍稍
吾親漸老髮斑斑豈曾有夢到天上且任此身浮世間
願約漁樵同小隱謂予不信有南山

麥苗已有生意掘烏穢者未止

兒童飯犧女採桑水滿東皋耕事忙稻秧半綠麥半黃
天許食新饊粥香田父咨嗟仍笑語赤地一年今得雨
紫鰲有根妻子喜免填溝壑棄閭里

元日書懷

年光除日又元日心事今吾非故吾兩板不須書鬱壘
一杯亦強飲屠蘇添丁解事尋王母內子傷時念老姑
欲報情深恩罔極不終反哺愧林鳥

送游大治歸建陽

西風來雁歲欲晚
衰柳鳴蟬人語離
市道交游何足數
君家父子總相知
讀書要見古人意
立事正須年少時
話舊班荆尚無日
莫忘苦語有箴規

生朝無以自慰作留貧薦一杯

私居飯半菽官舍食無肉
何乃太清生囊無一錢蓄人
言骨相寒有智不如福
貧者輕於葉富者重如玉輕重
信然否世情手翻覆相彼守
錢虜無厭溪壑欲口不談

古今枵然瓠壺腹渠固笑我癯我亦笑渠俗珊瑚數十
株胡椒八百斛冥冥鬼瞰室一趺赤其俗未若貧而安
高枕睡常熟我家雲溪陽欹側數椽屋屋後蒔菘葷屋
前種梅竹室中四立壁但有書可讀世故驅我來營此
升斗粟仕不上青雲何如返耕牧頗怪草玄翁乃謂貧
可逐卒歲一布裘終朝一餧粥此外何所求吾生無不足

用前韻答黃一翁二首

緼袍敝狐裘晚飯可當肉諱窮竟未免豈不受儲蓄
利穎有泚恐愧王承福財固禍之媒越鄉忌懷玉君看
座右器已滿即傾覆聖賢用功處清心而寡欲於世淡
無求乃能實其腹誰令久青衫失策混流俗黃子振鶩
姿筆力扛百斛笑人龜手藥欲售先聚族知余頗清苦
應物未圓熟游宦不能巧俯首立矮屋鍛鍊知精金初
寒見松竹自立不堅定庸行徒聖讀誰謂漆園高俯首
砍丐粟窮作扣角歌老厭淄川牧古道寢斲喪時人方

遂逐有田南山南可辦一盃粥請廩歸去來世路早收足

豆羹采藜藿鼎食厭梁肉士欲齊得喪胸次要涵蓄我
晚頗聞道寧有慧無福外物皆浮雲此道等珠玉閱事
如閱碁已過安用覆回光照諸妄稍稍淡無欲與君共
玄談一笑時捧腹吾作詩留貪此語頗驚俗細看首蓿
盤豈減檳榔斛見金不見人渠輩非吾族君獨臭味同
吾固知之熟平生求益友今日並牆屋不肅兄事錢寧

以君呼竹力學追古人經史費抄讀我方病少瘳擁衲
膚有粟百念漸灰冷有牛不湏牧君如汗血駒墮地必
馳逐甘為走蹠蹠耻作雌粥粥有玉未嘗獻豈憂終則
足

讼檄如蒲圻訊民之食菜事魔者作詩憫之

三代日方中為民破重冕既蝕復光融孔孟道益尊古
禮今則亡陳編意猶存飲燕用觥籌薦享羞羔豚瞿曇
何為者髡首徒實繁不飲非畏義不殺非知仁舉世昏

不悟跣足行荆榛胎禍產妖幻與物歧又分俗愚有墨
誤吏議多渙文怒言必溢惡疑似恐不根黔首亦何罪
可憫不可嗔大道若返古怪說難眩民帝居虎豹守此
語誰扣閭

和游堯臣勸農韻

傳呼穩凭筭輿行喜見漫山麥浪平道上老農皆好語
年來瘦地有新耕草深黃犢陽坡暖雨過青蒲野水生
桃李陰中春事好田家雞犬亦歡聲

到胡道士草菴

清風颸颸竹萬箇
白日寂寂茅三間
春深只有鳥呼夢
地僻畧無人叩關
豈但壺中堪避世
也勝圖上可遊山
出門回首不能住
輸與道人閒復閒

出郊雜詠四絕

閉戶不知春色佳
柳稍欲暗可藏鴉
鴨頭新綠齊腰水
女頰輕紅刺眼花

道上東風掠面輕
一犁雨足得新晴
草頭蛱蝶自由舞

林下鷓鴣相對鳴

孤烟近見數椽屋急水時行獨木橋入眼異鄉風景別
脩眉一抹暮山遙

雲昏山色収圖畫雨過泉聲雜管絃馬上得晴春滿眼
好花迎客亦嫣然

旅中思家

野田既雨水皆溝山路無風花自香且復將身供世事
也能隨處對春光絕嫌俗物眼多白未辨生涯鬢已蒼

待看楂梨粗可教老夫耕釣即韜藏

晚憇田家二絕

家書未到鵲先喜春事無多鶩又啼偶對好山留客坐
綠陰遮屋日將西

山間一徑牛羊迹林下數家雞犬聲底事居人苦爭畔
閒田官正募民耕

上已

莫春祓禊好天氣不到水邊流一杯旋擘紅泥嘗煮酒

自循綠樹摘青梅淹留異縣客多病迢遙故鄉書不來
歷歷舊時行樂處凭欄小立首空回

過浯溪讀中興碑

日光玉潔元子辭銀鈎鐵畫顏公書百金不憚買墨本
摩挲石刻今見之猗那清廟久不作其末變為王黍離
春秋一經事多貶魯頌四篇文無譏漁陽鼙鼓入潼華
公卿徒步從六飛朔方天子扶九廟京師父老迎千麾
紫袍再拜謁道左上皇萬里旋鑾輿壯味鳴晨有悍婦

孽狐喫夜有老奴扶桑果果未齧蝕但歌大業吾何疵
首章義正語未婉前輩不辨來者疑正須細讀史克頌
未用苦說涪翁詩許張勁節震金石李郭壯武如虎貔
斷崖蒼石有時泐諸公萬古聲烈垂天憐倦客有所恨
雨濕江寒催解維神州北望三歎息翰墨是非何議為
湘中雜詠三絕

有懷冉水柳司馬更憶浯溪元道州仕宦兩公俱落莫
斯文千古共傳流

順流鳴櫓不論程上水開帆取次行逆順自從人意轉
風生波湧本無情

中流四顧浪花平雙櫓夾船鵝鶴鳴欸乃聲中山水綠
不妨緩緩計歸程

豐年謠五首

蒲箔春蠶得繭絲家家機杼換新衣五風十雨天時好
又見西郊稻秫肥

縱橫南陌接東阡婦餉夫耕望有年前此丁黃饑欲死

今年米賤不論錢

洞丁僂戶盡歸耕篁竹無人弄寸兵要識二天恩德廣
黃雲千里見秋成

睡鴨陂塘水慢流離離禾稼滿平疇共言官府催科緩
飽飯渾家百不憂

稻如馬尾覆溝塍桑柘陰中雞犬鳴收穫登場便無事
輸租人不入州城

再用元韻因簡縣庫諸先輩

書生卯飯動及午薑粉菜絲煩自煮異時甘脆屋渠渠
出自空腸千卷書竹間杵臼相敲擊茶不療飢何苦喫
泉新火活費裁排呼奴更挈銅餅來蜀客見之心逐逐
暫借紙窓休繭足歸歟家在淮湖邊草魁可買無青錢
不辨雲腴供粥飲空有來詩如束筍青箬小分鷹爪香
江上拏舟當遠引

江上為韓毅伯訪得便舟

銅墨纏腰雪上頭人生一飽亦難謀天明忽暗釀梅雨

風暖又寒催麥秋老矣不堪時節換粲然方幸故人留
白雲呼去淮山住強為江邊問買舟

解官到郡諸丈置酒岳陽樓招炎為客鄧巴陵索

詩

重上危樓覽洞庭故人一笑對飛觥君山只似艣山綠
江水不如湘水清一日勝遊成樂事三年俗宦損詩情
天涯邂逅還離別莫惜尊前底裏傾

和程丞遊清水高黃龍山韻

嵐光野色共扶輿見說壺天氣象殊疊巘吞雲主角露
寒泉觸石篆文綺荒涼佛屋存遺像窈窕寃仙嵒有別區
何日青鞋親扣厯細評佳致染松腴

和陸簿九日二首

西風拂面飲微酣小摘茱萸手自簪極羨酒兼詩共好
正緣人與景相參杜門不復貪游賞落帽無由際劇談
嘆息登高兄弟遠目隨鴻鴈過天南

風露蕭蕭木半黃老來淡薄似秋陽一樽冷落思佳客

九日淒涼在異鄉採菊何心追靖節哦詩無語答仇香
危臺戲馬今何在休惹清愁攬石腸

題童壽卿博雅堂

曾道莫如約要識胸中真講學亦貴博不廢紙上陳王
充與李邕世豈無若人中秘未許見市肆何所聞童君
家多書乃為我輩慮安用蓬萊山萬卷皆此聚又復附
益之秦碑及周鼓剗溪來楮生欵穴會石友持此分雅
俗清渭映濁涇不賄屋自潤無爵身亦榮好事時相遇

不憚倒屣迎揮麈言有味寂如無市聲歎如漢中郎孰似楚左史孰能誦亡書歎解作奇字是中猶淵海隨取即隨有或問賈幾何還可商度否掀髯笑謝客吾非鬻鬻

書叟

題遠山平林圖

山色微茫疑有無木葉半脫殊蕭疎雲根更着數椽屋此屋當有幽人居墨妙逼真乃如此畢竟非真惟近似何如屐齒飽經行是處溪山皆畫笥還君圖畫吾且歸

家在江南依翠微

用元韻答劉判官

邂逅章江上，知從五馬車。
君才猶未用，吾老更如蟄。
澗思眉宇殷勤得手書，喜聞衣綵樂。
入饌有江魚。

冬雪行并序

甲寅歲雖小稔，縣官和糴米價遠增。
兩日雨雪市中貧民有無炊煙者，艱糴反甚於去年之凶歉。
父老輩遂具公牘赴訴於庭，因成冬雪行一篇。其辭如古樂府。

其義則主文謫諫言之可以無罪者也

擁衾展轉夜不眠細數更籌知苦寒角聲未動紙窓白
兒曹報我雪滿簷玉妃剪冰出天巧飛花萬點爭清妍
朱門貴人對之笑初見一白來豐年金罍玉爵扶春筍
飲罷敲冰煮新茗綉幃中有紅麒麟輕暖勝春尚嫌冷
窮巷小家真可憐典衣糴米無炊煙江頭津吏日來報
往往上流無米船縣官要糴十萬斛天上符移星火速
去年秋旱糴陳腐今年秋熟米如玉且願扶桑枝上紅

日乾東來却膝六今年冬雪民已臞明年春雪民更饑
九關有路虎豹守欲語不敢空長吁

次韻答簡簿

少日牛衣嘗熟眠老來駝褐不護寒欲呵龜手拈禿筆
怯看冰柱縣踈簷東風不解着楊柳翻作六出欺春妍
春回臘盡亦何好但為浮生添一年負耶有人如石筍
雪裏哦詩自烹茗胷中盎盎有天和戶外蕭蕭尚冰冷
日炊脫粟不自憐却念野廬無爨煙未知此更可解否

準擬為君浮酒船。酒酣傾瀉珠百斛。定覺揮毫轉神速。
聞道諸公雙眼青。豆終遺此豐年玉。倦游別駕老更貧。
自謀慚似龜藏六詩來。謂我清而腥。我方忍慾將忍饑。
短蓑歸釣寒江雪。紛紛世事休嗟吁。

題徐參議所藏唐人浴兒圖

右相嘗慚呼畫師技癢。仍復拈毛雖逼真。誰作此膠本。
亦有妙意生妍姿。中庭燕坐必主婦。綠雲高髻香羅衣。
嫣然嬪妾左右侍。前浴能言丹鳳雛。娉婷及笄女公子。

素腕擁項相攜扶兩兩為朋四鬢亂乳盧隨逐相詣嬉
掌中看珠二少父捧顛却立鴉鬟奴屏間擁膝袖玉箏
疑是夢蘭蕙翠眉側身背面按箏者永肌綽約不自持
牀前跪起各殊麗為兒理髮挾涕淚有犬爛斑受摩撫
與人習熟無猜疑梳裝淡薄服製古如見永微貞觀時
若非侯家及主第人物無此美且都荆釵布襦小家婦
生子不如山下鹿

題徐商叟所藏李伯時四天王圖

龍眠有巧手幻出汗血駒老衲或戒之回向心地初遂
畫白衣仙蘄與梵釋俱北方四天王亦附瞿曇尼難以
馬龍像宿習終未除四王名字異且復形狀殊信者謂
其有疑者意其無蕩蕩天門高誰能凌空虛何以信不
疑取諸貝葉書子不語怪神從釋恐畔儒語之且不可
筆之其可乎因畫議及此於公意何如

即事

時寓清化

久輶囊中句時看肘後方有家如旅舍無事似僧房梅

白墻頭笑榴紅甕面香杖藜如可出溪上探春光

勸農道塲山

練日遵詔條行春勸耕事擁旆有傳呼據鞍小馳驚兒童喜聚觀父老歡來詣松徑度坡陀蓮宮得清閑此行非遨遊所職在撫字示之淺易語諭以丁寧意扶杖既言歸解衣聊少憇山中無俗情物外有幽趣僧間衆所羨農困吾甚愧不敢飽登臨肩輿下山去

夜半聞雨再用前韻

輶輶百尺汲無水映日四山雲不起朱幡浪說勸農柔
衣食何從可甘美禱而得雨不苦旱竊疑此殆偶然爾
夜半潺潺簷溜鳴孤枕夢回心失喜兒童挽犢婦餉饂
紓襪耕夫亦勤止鼠跡印我榻上書蛛絲罥我壁間塵
抖擞胷中三斗塵強欲哦吟無好語請公酌酒更揮毫
快寫珠璣歌喜雨

雙溪種花

雙溪漸有雜花開每日扶筇到一回勝似名園空鎖閉

主人至老不歸來

蒼頭為我刷西山扶病移花強自寬縱不為花長作主
何妨留與後人看

舟行過白石見將使夜宿毛家林翌日到革蓑却
回和清老

蒼頭倦晨炊卯飯幾及午泝流赤日中舟子亦良苦魚
躍戀芳餉鷗飛避鳴櫓仙翁所退藏好境自呈露溪水
清可鑑山雲橫不度坐斷泉石幽不受塵土汚問之何

所得妙處難悉數初非練玉泉亦不鳴天鼓人癯道方
肥心遠貌亦古老衲同我來得句時一吐物色盡詩材
筆底隨指呼行行更前之繫纓日未莫轉柂涉奔湍支
筇入幽塢倦甚宿茅茨睡熟不能寤遲明又蓐食凌風
上前浦重露雨點疎晴嵐雲氣布蝗蝻尚飛揚禾稼難
愛護村落有狗偷耄倪且狼顧念此一悄然回舟雙港
渡空羨皎然師詩成有神助


病中書懷

丙子

鶴骨雞膚不耐寒那堪癬疥更斑闌
開年慘淡陰兼雨終日抓搔寢不安
未可給扶親几杖豈能見客攝衣冠
人言剝復相更代頻把韋編反對觀



宋詩鈔卷四十五



總校官庶吉士臣張能照
校對官庶吉士臣陳墉
謄錄監生臣薛翰

欽定四庫全書叢要

集部

宋詩鈔卷四十六



詳校官候選知縣臣吳國華

欽定四庫全書

會要卷二萬二百九十九

集部

宋詩鈔卷四十六

內閣中書舍人吳之振編

唐庚眉山集鈔

唐庚字子西眉州丹稜人年十四能詩文賦明妃曲題醉仙崖諸作老師匠手皆畏之中紹聖進士為州縣官至大觀始入為博士張商英薦其才除提舉京畿常平商英罷相庚坐貶安置惠州會赦復官承議郎

提舉上清太平宮歸蜀道病卒年五十一自南遷海
表詩格益進曲盡南州景物略無憔悴悲酸之態劉
潛夫謂其出稍晚使及坡門當不在秦晁下今觀其
結束精悍體正出奇兀淡在簡淡之中神韻寄聲律
之外雖云後出固當勝爾

憶昔行

憶昔方東來亭傳荒荆棘風庭紅葉乾雨砌蒼苔濕飢
虎撥門開哀禽向人泣十載却西還亭傳已完算青銷揖

江山朱欄越階級行旅糧不費大路遺敢拾蜀道無難
易人心自寬急寄信守亭者勿使狐狸入

張求

張求一老兵著帽如破斗賣卜益昌市性命寄杯酒騎
馬好事人金錢投甕牖一語不假借意自有減否雞肋
乃安拳未省怕嗔歐坐此益寒酸餓理將入口未死且
強項那暇顧炙手士節久凋喪舐痔甜不嘔求豈知道
者議論無所苟吾寧從之遊聊以激衰朽

黎城酒

黎城酒貴如金汁解盡寒衣纔一吸獄曹參軍到骨窮
簿書吻燥何由濕夜來細雨落簷花對客惟有嘗春茶
明朝踏月赴早衙免使路中逢麴車

晝寢效魯直

雨餘熱喘殊喊呀坐翻故紙腰足麻鋪陳枕簟塞青紗
倒牀不復知橫斜夢魂飛揚遠還家故人見我一笑譁
須臾睡覺衙鼓過牆頭暝雀聲槎槎

城上怨

雨似懸河風似箭風號雨馳寒刮面何處巡城老健兒
城上謳吟自哀怨不知底事偏苦傷聲高聲低哀思長
戍邊後重畏酷法去國年多思故鄉城上歌時夜方半
正是孤齋醉魂斷和風和雨兩三聲推枕投衾坐長歎
傳聞勁敵動熙河戰士連年不解戈今夜風號雨馳處
城上哀怨知幾何

客至

山頭竹萬箇風來玉相戛下有屋數間蕭然如佛刹門
無車馬喧幽徑芳草生隔窓識君聲遽起投筆札黃雞
未啄黍環堵無可殺園蔬煮淡泊山泉啜甘滑何以樂
嘉賓春禽日嘲哳

聞東坡貶惠州

元氣脫形數運回天地內東坡未離人豈比元氣大天
地不能容伸舒輒有碍低頭不得仰閉口焉敢顏東坡
坦率老局促固難耐何當與道俱逍遙天地外

寄郭潛夫

我昔游瀘江泛舟奔楚宮黔江自南來胥會涪之東
黔江清且碧瀘江濁而紅紅碧不相入分流如卧虹羣鷗
激湍濤洶湧成戰攻湏臾盡變濁混混顏色同清固不
勝濁此理天下通君視開成間牛李爭長雄要之贊皇
子不勝太牢公物理自古然徘徊歎無窮

送趙元思司法

誰不從王事夙夜獨匪懈休沐猶坐曹伏日不歸廡平

生熟大法餘事止小楷自稱霹靂手作縣真癰疥董宣
雖強項臨事中實駭從君學吏禮稍稍識起拜今當告
別去何以贈行邁二十四罰自親此理湏少戒

到任後寄家兄

君子所就三為食最為下起家仰寸祿此實下焉者南
山無敢廬千里就館舍但使食有魚敢言曹乏馬同寮
皆故人每事相假借况復官長賢醉歸應不罵

送趙安道下第

大官危小官卑君不得官君勿悲君不見前日宰相今
海涯胡椒八百斛流落知為誰又不見州縣官折腰事
細兒常憂一語不中治敢對西山笏柱頤大官危小官
卑君不得官君勿悲願君酒量如鴟夷勿作瓶罈居井
眉與君賭取醉為期明日烏帽風披披

中秋遇雨感懷呈世澤彥直

初遊東都年二十清歡趁得中秋及南陽會中酒徒集
惠和坊裏綉鞍入蟹螯嘗新左手執雞頭未老接玉粒

杯行到手不待揖明月清風供一吸纏頭不惜傾箱給
倚賴決科如俯拾誰知得官反拘繫此景此歡那復緝
今歲中秋雨如泣窮山牢落秋光濕孤燈熒熒照書笈
屈指流年如箭急

讀邸報

當今求多聞取士到蓬蓽時時得新語誰謂山縣僻昨
日拜御史今日除諫官立朝無負漢恩厚論事不妨晁
氏安臺省諸公登袞袞閉門熟睡黃紬穩

訊囚

叅軍坐廳事據案啞齒牙引囚到庭下囚口爭喧譁叅軍氣益振聲厲語更切自古官中財一一民膏血為吏掌管鑰反竊以自私人不汝誰何如摘領下毬事老惡自張証佐日月明推窮見毛脉那可口舌爭有囚奮然出請與叅軍辨叅軍心如眼有睫不自見叅軍在塲屋薄薄有聲稱只今作叅軍幾時得騫騰無功食國祿去竊能幾何上官乃容隱曾不加譴訶囚今信有罪叅軍

宜揣分等是為貧計何苦獨相困參軍噤無語反顧吏
卒羞包裹琴與書明日吾歸休

喜雨呈趙世澤

去年雨多憂水潦今年雨少憂枯槁都緣縣政失中和
水旱年年勤父老前時雲起雨欲落夜半風來還一埽
明朝回首望雲漢屋上晨暎仍杲杲賦輸百萬未破白
簿脚緣何得勾倒上書自効欲歸去老婦挽衣傍尊橐
技窮往訴北山神是夕沛然償所禱稻畦擺種勢已活

竹裏蕭疎聲更好故應神意憫孤拙苟免歲終書下考
便安枕白伺秋成雲子滿田行可擣

蓬州杜使君洪道屢稱我于諸公聞之愧甚為詩

謝之

去天一尺古蓬州年來除守得勝流渠家本是城南杜
詩律賢我三千籌如此才高却解事入眼人才皆可憐
他邑猶分刺史天片言每為將軍地故應憐我退無田
力相推挽令向前傍人聞說皆撫掌竹竿那使鮎魚緣

嘲陸羽

陸子作茶經竟為茶所困其中無所主復著毀茶論簡
賢傲長者彼自愚不遜茶好固自若于我有何恨便當
脫野服浣殘為一獻飲罷翠荼去譬彼澆畦碗君看櫛
正平意氣真能健達與不達人何啻相干萬

戊子大水

踏歌喧喧雜鐃鼓潭邊呼龍今作雨龍嗔揮水十丈餘
千村萬落幾為魚寄謝龍神且安處熟睡深潭不驚汝

夜半傳呼河入室攬衣下牀深沒膝舊來水不到誰門
老巫歸谷西門君西門君去老巫舞明年却娶河伯婦
除鳳州教授非所欲也因作此以自寬

人生纔食頃何處分好弱刑獄即道場筦庫有真樂故
紙終日翻毛錐幾年閤百函無力致諸公誰說著今承
學授乏頗訝名字錯宿業豈無戀得治不敢躍骨肉遠
難俱囊裝貧易縛師儒要好手老大良非脚憂盡識羨
空抽窮知薄後生端所畏人材若為作豈惟嘲孝先

便恐因有若行路固知難得地幸不惡柳拖千丈絲山
集五色雀絳紗諒無有苜蓿聊可嚼况聞豆積嶺中有
不死藥

將家遊治平院

蓋老杜所謂東津也

年來官職如水樣只有登臨作酌賞好山一一如佳士
令人欲作傾家釀昨日西樓弔王孫今日東津悲逐臣

江邊勝事略尋徧不見海棕高入雲

受代有日呈談勉翁謝與權

老來忽忽流年緊三見涪江秋葉墮紙緣二子日相從
便覺一瓢窮可忍東津曉作招隱賦西樓莫得思歸引
文字能令酒盞寬江山未放詩才窘分題跔躍誰避席
得句歡呼同破準泉名三逸本戲語野史千年傳不泯
醉歸半路飛蝙蝠餘興中宵伴蚯蚓那知須鬢秃于筆
但見兒童長如笋留滯甘為西域人衰遲更結束東遊勒
故山咫尺未成歸坐使蒼顏厚如胗

與舍弟飲

溫酒澆枯腸戢戢生小詩詩中何等語酒後那得知黃
菊遂行邁徑去不復辭拒霜猶屈強其勢何能為但問
酒有無勿計官高卑江邊捕魚郎教我當啜醕

劍州道中見桃李盛開而梅花猶有存者

桃花能紅李能白春深何處無顏色不應尚有數枝梅
可是東君苦留客向來開處當嚴冬桃李未在交遊中
即今已是丈人行宵與年少爭春風

武興歌

去年山中無黍稷只有都根并橡實都根作麪如食蜜
橡實炊飯如剥栗東家有錢食橡實西家無錢惟食都
今年都盡橡實貴山中人作寒蟬枯

既以前韻贈勉翁復懷庭玉因為次韻

千金駿骨買虛名驥老通衢價未平遂去定知窮不死
向來元以句為生東風又見鶯朋友北信難憑雁弟兄
欲寄此懷惟有月天涯分與故人明

游仙雲宮

出郭三竿日橫江一葦航雀飛田有麥蠶罷野無桑下
馬危梯滑開門古殿香雨餘丹井溢苔入醮壇荒畫老
星辰動碑殘歲月亡鐘聲落城市符祝走村鄉野鳥啼
巴蜀山崖刻漢唐臨歸更回首惜此一襟涼

直舍書懷

寸枉非吾志休論尺與尋黃披終日卷青對十年衿風
眩藥囊減雨昏茶椀深揚雄名宦思都向草玄沉

固處本來冷此時仍更清擁爐成久坐曳杖却徐行暝色侵書帙秋陰入鼓聲悠然索馬去祇此是功程

夜坐感懷

聲斷鍾樓月文書對坐時破窓燈焰走凍研筆鋒遲名利髮將鶴風霜手欲龜何當一簑雨披曉剪葛絲

述懷

名字雖云繫列曹儒風門戶只蕭騷頭顱自揣宜藏拙指目何妨笑養高本以食貧來仰祿豈于王事更辭勞

老來精力堪驚歎一紙文書輒數遭

秋夕書懷

亹亹歲華侵垂垂老境臨時光自風雨寒色到衣食萬
寂號秋杪孤燈照夜深蛩聲亦清苦唧唧伴人吟

過田橫墓

成則為王敗則亡英雄成敗本尋常滄溟無際何妨死
却死東郊未耿光

九江梁楚竟誅更自古才高必見疑脫使酈生猶未死

將軍來此亦何為

和程大夫荔枝

家在岷峩飽荔枝十年遊宦但神馳側生流落今千載入貢稱珍彼一時定自不將凡果比如何偏與瘴烟宜白頭莫作江南客牽負山中故友期

寓精道齋有感懷家山

論兵作賦兩匆匆人事光陰轉首空半夜夢飛山色裏一年秋在雨聲中揚州騎鶴非無意上蔡牽黃信此窮

幸有林泉未歸去欲將清興問征鴻

悠悠功業老堪憐舊事憑誰可共論直欲酒中賒快樂
尚能花裏覓寒溫詩書誤我成何事歲月侵人不見痕
汾水年年秋雁到庾郎何處不銷魂

晚春寄友人

眼底春愁惱殺儂揚州往事旋成空風流只合稱狂客
衰颯何堪作病翁水國春深梅子雨江天日暮鯉魚風
何時執手同尊酒收拾清歡笑語中

浦眼無青斷送春多情饒病兩闊身只知老去人心改
不覺愁來酒盞頻霜鶲空拳知有命溟魚竭水恐傷神
丈夫出處端無據猶欲辭家再入秦

春日雜興

愛梅長恐着花遲日禱東風莫後期及得見梅還淡冷
東風全在小桃枝

茸茸小雨弄春晴已有狂花未見鶯便使一年惆悵在
曉寒寒夢別輕盈

短帽輕衫信馬行
郊原春色太華情
兔葵燕麥渾閒事
最有蕪菁到處生

月團新碾破春醒
賴有歸鴻寄好音
人在天涯莫回首
恐偷華髮上瑤簪

別閩中許秀才

臨岐長歎息此歎意深微浮世年年別初心事事違
把參蜀道遠犯斗海槎歸故國有餘樂黃雞秋正肥

灌息軒

仙家林館碧雲圍
掃却浮塵晝掩扉
萬事年來俱是幻
一瓶朝汲已忘機
花深曲徑春無盡
人在閒庭鳥不飛
見說漢陰今復有
欲凌霄漢挹清輝

書新堂

疊茅重葺一堂新
設榻聊安簿
領身落枕不知鶯
樹曉汚書長苦燕泥春
獄官何預青苗事
野意新便白葛巾
能向此間時得趣
何須分外拜車塵

除夕感懷

永漏侵春已數籌
地爐猶擁木棉裘
無心豈畏三屍訴
愛日還驚一歲休
故國二千空醉眼
新年三十怯平頭
光陰未用相敦迫
領取衰翁兩鬢秋

春日郊外

城中未省有春光
城外榆槐已半黃
山好更宜餘積雪
水生看欲倒垂楊
鶯邊日暖如人語
草際風來作藥香
疑此江頭有佳句
為君尋取却茫茫

自笑

已白窮經首仍丹許國心那能天補綻更欲海填深兒
嬾嗔郎罷妻寒望藁砧世間南北路何用爾沾襟

直舍夜坐

強仕似幼學細書仍短檠月來吟處白風及醉時清坐
久露微濕更深秋有聲不知愁底事終日自悲鳴

內前行

以後係
惠州詩

內前車馬撥不開文德殿宣麻回紫薇侍郎拜右相
中使押赴文昌臺旌頭昨夜光暉滿是夕收芒如禿帚

明日化為甘雨來官家喚作調元手

右相視事明日始得爾喜甚吉尚深

二大字
賜之

周公禮樂未要作致身姚宋也不惡向來兩翁

當國年民間斗米纔四錢

長沙示甥郭聖俞

我昔官閩中子時趨長安相過日夜飲肯使笑語乾但知醒復醉誰問甜與酸攬衣步中庭仰首羨飛翰誓言早歸休慎勿貪高官時未有添丁眼前惟木蘭甥舅一
分背日月雙跳丸那知十年外相見西江干拜起未寒

溫悲來客汎瀾我髮已禿翁子顏非渥丹相從海上志
茲事人所難阪行白漭漭山宿青攢攢人烟小歲後草
木深冬完昨日次長沙扁舟掠湘灘中流遭惡風滿衣
潑驚湍船如箕尾點天作車輪團怖畏目敢側禱祈指
頻彈向非鬼神助幾作蛟龍食忠信時可憑聖賢豈吾
謾勿畏嶠南熱我清物自寒勿憂海邦陋心廣身亦寬
磨刀砍鯨鱣隱几看鵬搏努力近藥物明年理歸鞍得
之兩鴻鵠龜筒不須鑽

張曲江鐵像詩

像在韶州韶人相傳
明皇悔時所鑄云

開元太平久錯處非一拍就令乏賢人何至相仙客直道既凋喪曲江遂踈斥沒蹠困後薪賈生罷前席金鑑束高閣鐵胎空數尺妙處難形容英表良髮鬚摩挲許國姿尚想立朝色同時反棄置異代長歎息

湖上

佳月明作哲好風聖之清湖邊得二友夜語投三更烟露兩相濕水天參互明散衣芭蕉涼曳杖桄榔輕星走

拋餘光山空答虛聲歸矣不可畱過幽恐神驚

雙榕

水東雙榕間有叟時出遊清風衣屢古白雪鬚髯虬吟
哦明月夕簷弄寒江秋鶯傳里中兒不泊岸下舟君看
鬼趣中有此風味不安知非黄石但恨無留侯此生鉏
犁手誤入簪紳流無功折毫髮負罪平山丘政爾求潔
濯聞之歎綢繆撫衣倘可親跪履安敢羞得聞半偈語
一解終身憂性不喜伐國兵書非所求

大熟行

去年大雪埋尺篋水北荔枝遭凍死共嗔北客帶寒來
我欲分疏誰受理今年諸峒十分熟東江不下龍川米
南翁北客兩欣然孰與忍飢食荔子

蜜果

臣聞失旦雞已曉猶強鳴書生坐口窮抵死輸血誠嶺
南貢蜜果海道趨彤庭黃蜂樂受職紫鳳助揚舲忠勤
雖云至思慮良未精由來瘴癘鄉不識霜雪情土風不

待講氣象昏如醒抗稻抗稻熱水泉水腥而况野果
實豈足奉聖明未論體性殊已覺面目生食之倘有補
勞者甘如餳政恐無裨益所出非和平上林寧少此下
箸安可輕軒轅嘗百毒上古雜神靈武王嗜鮑魚幾諫
仗老成芻蕘復何有葵藿但自傾

圓蛤

黃犧鳴水中相顧皆愕然探之亡所得有蛙僅如錢持
問傍舍翁云此號圓蛤夏潦漲溝渠喧呼自酬答卒然

聞其聲謂當可專車既見一撫掌才筵量有餘物生元氣中小大各異趣蛙質黃牛鳴持此欲誰附我居固已陋爾鳴良亦村綿蠻轉黃鸝我今思故園

白小

二年遵海瀆開眼即浩渺謂當飽長鯨餉口但白小百尾不滿釜烹煮等芹蓼咀嚼何所得鱗鬚空紛擾向來巨魚戲海面橫孤嶠喰噉噴飛沫白雨散晴曉終然不省錄從事此微眇短長本相形南北無定表泰山不為

多毫末夫豈少詞雄兩月讀理足三語妙人生一渙發
誰作千歲調安能蹲會稽坐待其年釣

瘧疾寄示聖俞

體中初微溫末勢如湯鑊忽然毛髮起冷撼如振鐸良
久交戰罷項背如釋縛尚覺頭涔涔眉額如鎌鑿空日
一寒暑有準如契約伏枕兩晦朔枵然如空橐平生十
圍腰病起如飢鶴衰髮本無幾脫去如秋籜到今僅能
步出沒如尺蠖舊聞五嶺法有此萬戶瘧而我自僑寓

了不蒙潤略况子又持養何至亦例著此身自空虛客
疾安所托請作如是觀無病亦無藥

示蟹

先君捐館年六十畸三算我今四十三始得幼子蟹餘
齡繼前躅蟹也纔及冠況復未可知孝章積憂歎祿養
宜不欲茲事覺已緩但愛眉目秀體質淨如盥顧瞻既
精神懷抱亦氣岸今者新剔髮瑩若珠未貫見之令人
清面擁疲手腕輒然攫吾鬚霜雪落几案豈惟不肯嗔

更對一笑粲骨肉今已矣持汝慰奔竄行當從諸兄誦
書喧里閈而我于經術粗能分句斷發蒙要師資心孔
為闕鍵許慎專偏傍張華休史漢吾家業儒久捨此無
別段不應緣一噎便欲廢炊爨及親三釜足未用萬戶
鄰人生百年期我今特未半

夢泉

并引

潮陽尉鄭太玉夢至泉側飲之甚甘明日得之東山
上因作夢泉記示余命作此詩

入道肯着相出神得佳泉起尋定中境謾意山之巔四
人蹋蹴蹴數里聞潺湲循聲到巔絕滿意流甘鮮雖深
石可數太察魚難筌分為縞練去濺作珠璣圓一窺宿
醒解三咽沉疴痊恍惚尚疑夢歡呼欲成顛山間知予
井海飲鹹生涎那知道在邇幾作野遺賢事故由人興
物為知己妍誰陪濛上游詠携室中天雖無十丈花中
有一滴禪名酒覺殊勝宜茶定常煎蘭亭羽觴冷魚復
青筒連新文來遠矣開卷猶渙然徑欲抱琴去臨流聽

未全不但受以耳庶幾神者先寫為夢泉操第入樂府
篇將前輒復却萬事付有緣

鳴鵠行

簷前羣鵠鳴相呼法當有客或遠書吾今何處得書尺
而況賓客乘軒車平生眼中抹泥塗泛愛了不分賢愚
卒為所賣罪滿軀放逐南越烹蟾蜍百口寄食西南隅
三年莫知安穩無家書已自不可必更望故人雙鯉魚
故人頃來絕能疎况復萬嶺干江湖雞肋曾是安拳餘

至今畏客如於菟豈惟避謗謝還往此日誰肯窺吾廬
杜門却掃也不惡何但忘客兼忘吾喧喧鳴鶲汝過矣
眉不往噪櫂門朱

採藤曲效王建體

魯人酒薄邯鄲圍西河渡橋南悲歲調紅藤百萬計
此貢一作無窮時去年採藤藤已乏今年採藤藤轉竭
入山十日脫身歸新藤出土拳如蕨淇園取竹况有年
越山採藤輸不前今年輸藤指黃犧明年輸藤波及屋

吾皇養民如養兒鑿空為此謀者誰

冬雷行

百蟲蟄處安如家阿香夜起推雷車一時技癢不敢爬
撼動尺蠖掀龍蛇龍蛇尺蠖踞已久亦欲奮迅舒頑麻
夢中一震忽驚躍發破墐戶排泥沙泥沙已出雷遽止
錯愕欲去難藏遮蟲蛇狼狽莫知數間有伏龍吁可嗟

贈譚微之

去年絃歌程水濱旣中生塵范史雲今年講學鵝城裏

關西孔子楊伯起昔人論士觀心期時人論士看肉皮
只知黃鸝矜觜爪不識駒虞避生草

北歸至廣州寄惠州故人

歸心如躍馬奮迅不可駐別情如放猿已去猶返顧三
年孺子社數借柱史書好在五噫孫善保千金軀舊來
談天口老去盡地力萬里不相忘寄聲問眠食

南遷

去去寬鄉托此蹤閑中無地頓衰翁未誅綺語猶輕典

更賜羅浮有底功
蝦菜賤時皆丙穴
茅柴美處即鄆筒
着鞭要及春前到
趁賦梅花庾嶺東

渡汎

鶴歸遼海悲人世
獨入巴山叫月明
惟有沙蟲今好在
往來休並水邊行

武陵道中

朝持漢使節暮作楚囚奔
路入離騷國江通欸乃村垣
牆知地濕草木驗冬溫
寂寞桃源路行人祇斷魂

長沙道中

古古今今路朝朝莫莫行橘林香處飯杉木翠邊程山
帶湘靈慘川含楚些清江湖無限句遷客要才情

次泊頭

何處不堪老浮山傾蓋親潮田無惡歲酒國有長春草
木疑靈藥漁樵或異人近前端有得丞相未宜嗔

初到惠州

蘆橘楊梅乃爾甜肯容遷謫到眉尖因行採藥非無得

取足看山未害廉辯謗若為家一喙著書不直字三縑
老師補處吾何敢政為宗風不敢謙

謝人送酒

世情不到海邊村載酒時來餉子雲便欲醉中藏潦倒
已將度外置紛紜細思擾擾膠膠事政坐奇奇怪怪文
喚取鄰翁傳杓飲漸令安習故將軍

水東感懷

往事孤峰在流年細草頻但知其室邇誰識所存神碑

壞詩無敵堂空德有鄰吾民稍奸黠終日酒邉身

登栖禪山

海雨山烟撥不開眼前遮定一作蓋望鄉臺如何借得維

摩手斷取西南故國來

收景初書并示藥物

乾坤心腹友江海鬚毛斑藥補他鄉闕書開故

一作去國

顏何時乘下澤此日仰高山會是歸耕耦由來有賜環

九日懷舍弟

重陽陶令節單闋賈生年秋色蒼梧外
衰顏紫菊前登高知地盡引滿覺天旋去歲京城雨茱萸對惠連

收家書

西州消息到南州骨肉無它歲有秋驥子解吟青玉案
木蘭堪戰黑山頭即時旅思春冰拆昨夜燈花忝穗抽
從此歸田應坐享故山已為理菟裘

瀘人何邦直者為安溪把截將有功不賞反得罪
來惠州貧甚吾呼與飲為作此詩

楚人季布以勇顯魯國朱家用俠聞馳馬彎弓臣好武
吹毛洗垢吏深文王孫此日誰漂母卿子前時號冠軍
滿引一杯齊物論白衣蒼狗任浮雲

余在惠州作酒二種其和者名養生

主其稍勁者名齊物論後禁主字遂志其一

除夕

患難思年改龍鍾惜歲徂關河先聖遠天地小臣孤吾
道憑溫酒時情付擁爐南荒足妖怪此日謾桃符

人日

人日傷心極天時觸目新殘梅詩興晚細草夢魂春挑
菜年年俗飛蓬處處身墓頤頻語及髫鬌到東津

栖禪墓歸書所見二首

雨在時時黑春歸處處青山深失小寺湖盡得孤亭
春着湖烟膩晴搖野水光草青仍過雨山紫更斜陽

白鷺

說與門前白鷺羣也應從此斷知聞諸君有意除鈎黨
甲乙推求恐到君

有所歎

林中宴坐老沙門，豈願臨年觸垢氛。
正恐先生不得飽，欲令後死與斯文。
近逃台鴟居東洛，聞道衣冠滿北軍。
湏信此塗天一握，人間謾說有孤雲。

耕田佩印兩徒然，憶想平津只去年。
怪底功名稱地獄，誰將官府到天仙。
是非已付漁樵判，疑信難憑黨與傳。
杯酌豈能通大道，床頭當得酒如泉。

舍弟書約今秋到此

此日方收信前時已具舟開頭今幾月軟脚定中秋涼
德為兄添炎荒為爾憂從今西望眼應到見時休

夜坐懷舍弟

無雲仍露坐有月更江臯沉陸傷吾道浮生憶爾曹扁
舟應夏口此夕數秋毫不見今三載當時已二毛

送外甥之廣州

由也久從我牢之真有甥時情為客老秋色進泉清揆
刺朝朝味鈎輶處處聲越臺休弔古旅魄向來驚

九日獨酌

登高無老伴引滿自高歌歡意天邊少重陽野外多黃
花空歲月白首尚闊河他日龍山興吾今在網羅

壬辰九月二十三日天氣始寒以詩記之

朝來怪底冷前此已重陽漸逼袴襦節稍聞灰火香烟
嵐向冬淨橘柚得霜黃嶺表雖多暑天時亦有常

寄潮陽尉鄭太玉

又種羅浮一熟田江陽未得返耕廬書來似見眉間印

別後新增鬢上年下澤有車人誤矣上林無報雁徒然
去歲引關自陳無報越巫雞卜聞之久為問行藏若箇邊

次鄭太玉見寄韻

度外歸期未要論故山石筍自高蹲他時名譽牛心炙
晚歲窮空犧鼻裨君有詩書并畫絕我無德爵但年尊
音塵不繼應相悉萬事而今付默存

壬辰九月不雨至己年三月穡事去矣今夕輒復

沛然喜甚臥作

老去生涯白木櫬脫逢艱食更何堪春深野色憂年惡
夜半簷聲覺雨甘睡外莫聽泥活活想中已睹麥含含
明朝竹徑添幽事玉板堂頭作小參

舍弟既到有作

武陵倉卒記他時我獨南翔子北飛覶過幾多歸後事
相看仍是別時衣匪躬老矣惟心在便腹依然但髮稀
尚有苦吟三十載與君同飽蜀山薇

收景初貳所寄

信斷常懷信斷憂得書還有得書愁未應宿業都相似
總為謗聲不肯休見說胷中卷雲夢莫將皮裏貯陽秋
而翁有道知興廢不患無詞詣播州

次勾景山見寄韻

此生正坐不知天豈有稀苓解引年但覺轉喉都是諱
就令搖尾有誰憐腰金已付兒曹佩心印還當我輩傳
他日乘車來問道輦間相顧共延緣

夜聞蜃戶叩船作長江礪欣然樂之殊覺有起予

之興因念涪上所作招漁父詞非是更作此詩
反之示舍弟端孺

當年無奈氣狂何醉檄涪翁棄短簾晚落炎州磨歲月
欲從諸暨丐烟波與君共作長江磯况我能為南海歌
身世即今良可見不應老子尚婆娑

北風累日不止寒甚寄鄭潮陽

山前臘雪想紛紛風到南訛盡處村瓮面不容存酒子
牀頭幾欲爨桐孫園林呼舞知衰怯窓戶奔馳覺眩昏

咫尺潮陽五袴國可能分我一襦溫

即事

歸心急似瀧頭水華髮多於嶺上梅正是堯朝猶落此
當時湘浦亦宜哉

還家久近書難寫破屋陰晴榻屢移吾道非邪來曠野
人生樂爾復何時

案頭行掃塵隨起窓眼繞封雨又稍更力窮空沽白餅
莫將疲羸聞黃茅

遣興

僧寺借經便大字隣牆喚酒及新芻三年于此得其理
一飽已還非所求

酒經自得非多學詩律傷嚴近寡恩田里歌呼無籍在
朝廷議論有司存

春日謫居書事

四十緇成素清明綠勝紅形容千慮後門館一貧中白
日時時別青蕪處處同此生唇舌裏啼鳥莫春風

大觀四年春吾與友人任景初舍弟端孺自蜀來

京師至長安時方寒食吾三人相與戎服遊九

龍池飲酒賦詩樂甚是歲吾遷嶺表明年景初

亦謫江左忽忽數歲皆未得去寒食無幾念之

悽然作詩寄任因命舍弟同賦

居今行古任定祖底事遷延亦未歸我坐力田傷地脈
君緣搜句漏天機故都回首三寒食新歲經心兩褐衣
學道一生凡幾化不因到此始知非

乙未正月丁丑與舍弟棹小舟窮西溪至愁絕處
度不可進乃歸溪側有兩榕甚奇清陰可庇數
十榻水東老人常飲酒其下云

楊梅溪上柳初黃荆竹岡頭日正長獨木小舟輕似紙
一尊促席穩于床樹從坡去無人識水出山來帶藥香
應有居民解秦語為言昭代好還鄉

有感示舍弟端孺

一出潼關五見梅愚忠幾欲伴黃埃弟兄手足窮孤竹

母子肝腸泣老萊好語忽從天上落行人直向

一作叩海

遙回此生報國無他事力穡供輸莫待催

長沙竹筍聞于天下大者可十餘斤食之甚甘而

不氷脾昔渡湘欲作詩未暇也今日復過之乃

酬以此篇

地入長沙莫歎卑竹萌徑尺舊相知九重纔復金門籍
萬里先參王版師契闊累年真負口徘徊彌月未妨脾
渭川風味那能對中有離騷九辯辭

雜詩

屏跡舍人巷灌園居士橋花開不旋踵草雜復齊腰蛤
吠明朝雨雞鳴間夜潮未能全獨樂鄰里去還邀

已絕經年筆仍開盡日門身謀嗟翠羽人事歎榕根蔬
食風掀市樓居水破村嶺南霜自薄何得鬢邊繁

便歸良不惡未去且隨緣戶口知無瘴謳歌覺有年藤
牋得句後桂酒抱愁邊經術吾衰矣猶堪舉力田

不死良難學全生或可幾茶隨東客到藥附廣船歸墓

倦收成敗書慵卷是非閑心無雜慮魂夢入精微

兀坐且如此出門安所之手香柑熟後髮脫草枯時精力看書覺情懷舉盞知炎州無過雁二子在天涯

飽食為茶地深耕覓酒材翻泥逢暗筍汲井得飛梅湖
盡船頭轉山窮屐齒回田間良自苦清興亦悠哉

壯歲日千里晚途天一方花縵聊傲世白袷亦隨鄉團
扇侵時令方書遣晝長此間吾所樂便擬卜林塘

雜興

白日消諸妄青山對屢空著書防惡客學圃問鄰翁織
貝流肌滑檳榔入頰紅丹砂落吾手秋至任飄蓬

多事定何補寡言聊自溫蟹黃嗔止酒雞白勸加食濯
足樓船岸高歌抱朴村愧無魑可禦只益負君恩

閑窄良難入閒寬足見容竹根收白疊謂竹布木杪得黃

封酒謂柳問學兼儒釋交遊半士農行歌村落晚落日滿

携筇

為農沙子步附保水西鄉隱几江天遠開門佛土香時

晴荒徑草野色淡淨一作漁梁欲縱高秋目東偏短作牆

舊物杯中酒新銜海上翁百非無一是顯過豈微功引

水江分碧烹丹井為紅幽居亦多事度日不全空

小市江分破連萍水卷翻到今佛跡在千古鶴峯尊浮
嶠來何處豐湖入數村登臨有何好秋至數消魂

已分詩驅使寧辭酒過差南烹人釣蛤北信客占鴉年
事侵膚理憂端宿肺家向來功業興到晚詠餘霞

覆載依然等寒暄乃爾殊雪曾前歲有地過此邦無煮

海鯨鯢動烹山虎豹呼南來何所得詩語帶娵隅

夜語不覺久晨興良獨難加之得卯酒晚矣恰朝食筭

蕨春生箸魚蝦海入盤南方禁太飽茗椀直須寬

海氣東南上野烟申酉間草平連別洞雨轉入他山道
路魚鹽去樵蘇竹木還西江并北客相對各蒼顏

水過魚村濕沙寬牧地平片雲明外暗斜日雨邊晴山
轉秋光曲川長暝色橫瘴鄉人自樂耕釣各浮生

浪跡蒼梧外放懷黃木東人情雙鬢雪天色屢頭風國

計中宵切家書隔歲通為儒得愁思一笑賴兒童

萬里非吾土三年失我常只愁鶯跕跕敢作鶴昂昂白
竹連閨越黃雲入夜郎何時返栖息誰為問桃娘

閒居

未許幽人曉夢長朝朝親炷佛前香有詩為愛東家酒
無病緣抄陸氏方身雜蠶中誰是我食除蛇外總隨鄉
白沙翠竹門前路疑出西郊向草堂

細細敲門細細應老翁方曲畫眠肱魚陂舊種千頭鱠

桑徑新窯十畝繒菜足尚堪分地主米餘翻欲供鄰僧平生惟有乘桴興咫尺滄溟去未能

聞勾景山補盞厓丞仍聞學道有得以詩調之發萬里一笑

人言盞厓似江湖莫對丞哉歎負余別後耳根無正始向來紙尾得黃初可憐鬼谷縱橫口全讀神溪縹緲書臣朔許長錢許少何當天子念公車

遣興

八千岐路愁何補四十光陰老亦宜此去只堪屏首飲
向來都是虎頭痴逢時有道其如命得意無言所恨遲
詩債即今渾倚閣新篇惟有莫相疑

春歸

東風定何物所至輒蒼然小市花間合孤城柳外圓禽
聲犯寒食江色帶新年無計駁愁得還推到酒邊

鄭太玉送子魚

便當權閣太常齋藥竈于傍手自煨湏信子魚藏妙理

坐令母蟹媿九才刀頭定向何時得劔脊頻將好意來
老去少陵雖病肺尚堪持此薦寒醅

江漲

秋來雨似澆雨罷水如潮市改依高岸津喧救斷橋雲
陰哭鳩婦池溢走魚苗天意良難測前時旱欲焦

代書寄鄭二

別後定何似此中難具陳倦憎秋氣濕老怯曉烟辛沸
議今方爾歸期覺愈伸須煩三絕手時復餉清新

夜久睡覺不能復寐淒然有感

無復更殘暑夜深清欲飢葉飛魂夢數露重語音知月
色到秋苦更聲臨曉遲平生憎墨翟老去亦悲絲

立冬後作

唱簾入佳境冬來幽興長瘴鄉得好語昨夜有飛霜籬
下重陽在醅中小至香西鄰蕉向熟時致一梳黃

端孺糴米龍川得粳糯數十斛以歸作詩調之

倒拔孤舟入瘴烟歸來百斛瀉豐年炊香未數神江白

米釀滑偏宜佛跡泉飽去定知頻夢與醉中何至便妨
禪憑君為比長安米看直公車牘幾千

謾成

雲暗便窓破山寒賴屋低往還天外少早晏雨中迷書
冊開仍闔履聲東復西何常有所賦得句旋安題

聞鄭二對吏五羊

舊友年來略散亡新收鄭子亦遑遑歲云暮矣無雙雁
我所思兮在五羊獄吏事權先自貴書生踪跡況能狂

風流人物今餘幾何忍羣兒復謗傷

東麓

經旬不見小羌廬忽爾相逢喜欲呼自入秋來更韶潤
却從瘦裏帶敷腴人間信有傷心碧坐上那無滿眼沽
可是清暉解悞客能令腸斷到愚儒

野望

賴有澄江在專供倚杖清水裁偏岸直雲截亂山平
鞞鼓知農隙雞豚覺歲成却緣搖落後木杪得孤城

獨遊

是日遊予獨幽情知者誰時光新舊歲節物淺深枝鴉
攫春祠敏禽窺野燒痴田園有妙理吾悔得之遲

醉眠

山靜似太古日長如小年餘花猶可醉好鳥不妨眠世
味門常掩時光簾已便夢中頻得句拈筆又忘筌

重陽後二日從無盡泛舟游處士臺故詩人秦龜

從所居

阜河經雨水微沙船帖基根日未斜三徑就荒悲白土
一樽相屬對黃花已將遠眺收平楚更遣清言到永嘉
要見仙翁頭似漆請看醉後落烏紗

生還至宜都逢李六

更把餘年着酒澆莫談前事費燈挑地緣有語封還止
印為無功鑄復銷賴是詩書能却瘴到今魂夢亦閒潮
頭西歸去君休怪尾段無多不奈焦

將赴闕有感示晦

老畏高門地，慵便下澤車。終然嬰世網，難作愛吾廬。
白首趨行在，青袍奉起居。平生誇好手，到此不如疏。

次韻幼安留別

白頭重踏軟紅塵，獨立鶴行覺異倫。
往事已空誰故舊，好詩乍見且嘗新。
細思寂寂門羅雀，猶勝纍纍塚卧麟。
力請宮祠如意否，漸謀歸老錦江濱。

宋詩鈔卷四十六